

## In «Pumppark» pil Center Fontauna

Venderdis ei il cussegl da vischnaunca da Mustér s'entupaus ella halla Cons a sia 20avla seduta dalla perioda d'uffeci 2021/2024. Sut l'egida dalla presidenta *Helga Propbst-Linder* ha el tractau principalmein la construcziun d'in «Pumppark». Il cussegl ha concediu persunter unanimamein ina summa da 165 000 francs per realisar in tal implont sigl areal dil Center Fontauna. Plinavon ei *Remo Huonder* vegnius saramentaus sco niev cusseglier da vischnaunca pil temps restont dalla perioda d'uffeci 2021/24. El remplazza *Martino Sabbadini* che ha abdicau per la fin digl onn 2022. Ina retscherca en connex cul project «vitgs da muntogna attractivs per giuvenils» dalla Gruppa svizra per las regiuns da muntogna (SAB) ha mussau ch'il basegns per in pumppark ei fetg grond. Cun realisar in tal spazi da recreaziun per cundrezs cun rodas sa la vischnaunca porscher in'ulteriura attracziun pil Center Fontauna. Quella completescha la purschida digl implont che vegn renovaus ed engrondius actualmein.

Plinavon ha il parlament communal priu enconuschientscha dil concept «augmentar l'attractivdad dil vitg». La suprastanza ha presentau las differentas mesiras che duein vegnir realisadas el center da Mustér. Finamira eis ei da scaffir bialas plazzas da sentupar, d'augmentar la qualidad d'elements architectonics leutier e da crear loghens per star da cumpignia. En quei connex vulan ins era optimar il sentiment da segirtad amiez il vitg e rinforzar il commerci e la gastronomia. La suprastanza communal vul nezegiar il potenzial existent amiez il vitg e cheutras daventar in liug aunc pli attractiv da habitar per famiglias ed affons, hosps e turists. (cdm/fmr)